

七十二家集

鮑參軍集序

宋書無文苑遂不為鮑參軍立  
傳南史因之俱附見臨川王傳  
中故鮑之閱歷殊覺草々獨虞  
散騎所為集序論次頗詳差補  
史闕按集中有上始興王白紵

歌又蒜山被始興王命作史不言魯仕始興或疑其無謂考虞序云臨川薨後始興王引為侍郎正與欠字合可補史之闕者一也集中有永安令解禁止啓梅禹金駁之曰史言照為秣陵

令未嘗為永安考虞序云秣陵  
令又轉永安令却與文字合可  
補史之闕者二也集中謝秣陵  
令表題下註云時為中書舍人  
且表有遠離省闕等語明是中  
舍在先秣陵在後乃南史倒載

云國侍郎遷秣陵令文帝用為  
中書考虞序中書舍人出為秣  
陵正與文字合此可政史之訛  
者三也又李周翰注文選蕪城  
賦引沈約宋書云臨海王子瑱  
鎮荊州照為叅軍隨至廣陵見

故城荒蕪乃吳王濞所都照以  
子項叛逆事同於濞為此賦以  
強按宋書並無此段不知翰何  
所據而稱之豈古今本頓異耶  
子項之荊州年甫六歲方在絳  
綰安得遽有逆形鮑安得預料

有明帝他日踐祚事且明帝定  
亂自立諸藩拒命子頊隨人舉  
義事敗賜死年甫十一亦與吳  
王淞不同想鮑賦自是懷古後  
人因而傳會耳誦讀以論其世  
不可不知也鮑官闕甚微而多

與顏延年謝希逸並梁陳壇苑  
奉為大家沿至唐代見推杜陵  
而品益貴

崇禎己巳秋日張燮題于離垢

卷



鮑參軍集目錄

卷之一

賦

遊思賦

觀漏賦

有序

傷逝賦

蕪城賦

芙蓉賦

園葵賦

舞鶴賦

野鵝賦

有序

尺蠖賦

飛蛾賦

卷之二

樂府

採桑

代蒿里行

代挽歌

代東門行

代放歌行

代陳思王京洛篇

代門有車馬客行

代權歌行

代白頭吟

代東武吟

代別鶴操

代出自薊北門行

代陸平原君子有所思行

代悲哉行

代陳思王白馬篇

代昇天行

松柏篇

并序

代苦熱行

代朗月行

代堂上歌行

代結客少年場行

扶風歌

代少年時至衰老行

代陽春登荆山行

代貧賤苦愁行

代邊居行

代邽街行

蕭史曲

王昭君

吳歌三首

採菱歌七首

幽蘭五首

申興歌十首

代白紵舞歌詞四首

代白紵曲二首

代鳴鴈行

擬行路難十八首

梅花落

代淮南王

代雉朝飛

代北風涼行

代空城雀

代夜坐吟

代春日行

卷之三

詩

侍宴覆舟山二首

從拜陵登京峴

蒜山被始興王命作

登廬山

登廬山望石門

從登香爐峰

從庾中郎遊園山石室

登翻車峴

登黃鶴磯

登雲陽九里埭

自礪山東望震澤



三日遊南苑

贈故人馬子喬六首

荅客

和王丞

日落望江贈荀丞

秋日示休上人

荅休上人

釋惠休贈鮑侍郎附

吳興黃浦亭庾中郎別

與伍侍郎別

送別王宣城

送從弟道秀別

贈傅都曹別

和傅大農與僚故別

送盛侍郎餞候亭

與荀中書別

從過舊宮

從臨海王上荆初發新渚

還都道中三首

上潯陽還都道中

還都至三山望石頭城

還都口號

行京口至竹里

發後渚

岐陽守風

發長松遇雪

詠史

蜀四賢詠

擬古八首

卷之四

詩

紹古辭七首

學古

古辭

擬青青陵上栢

學劉公幹體五首

擬阮公夜中不能寐

學陶彭澤體

數詩

建除詩

白雲

臨川王服竟還田里

行藥至城東橋

園中秋散

觀圃人藝植

遇銅山掘黃精

見寶玉器者

并序

懷遠人

夢歸鄉

春羈

歲暮悲

在江陵歎年傷老

夜聽妓二首

翫月城西門解中

喜雨

苦雨

詠白雪

三日

詠秋

秋夕

秋夜二首

和王護軍秋夕

和王義興七夕

王僧達七夕月下詩附

冬至

冬日

望水

望孤石

山行見孤桐

詠雙燕二首

酒後

講易



可愛

夜聽聲

味老

春味

字謎三首

贈顧墨曹

聯句

在荊州與張使君李居士聯句

與謝尚書莊三連句

月下登樓連句

卷之五

表疏

爲柳令讓驃騎表

謝秣陵令表

解褐謝侍郎表

謝解禁止表

皇孫誕育上表

征北世子誕育上表

拜侍郎上疏

侍郎報滿辭閣疏

轉常侍上疏

謝隨恩被原疏

啓

論國制啓

謝上除啓

謝賜藥啓

謝未安令解禁止啓

通世子自解啓

重與世子啓

請假啓

又

奉始興王白紵舞曲啓

卷之六

書

登大雷岸與妹書

頌

河清頌

有序

佛影頌

銘

凌煙樓銘

有序

石帆銘

飛白書勢銘

藥奩銘

文

爪步山楮文

附錄

鮑照傳畧

沈約

鮑照傳畧

李延壽



鮑明遠集舊序

散騎侍郎虞炎奉勅撰

鮑照字明遠本上黨人家世貧賤少有文思宋  
臨川王愛其才以爲國侍郎王薨始興王濬又  
引爲侍郎孝武初除海虞令遷太學博士兼中  
書舍人時主多忌以文自高照侍左右深達風  
旨作諸賦述不復盡其才思出爲秣陵令又轉  
永安令大明五年除前軍行叅軍侍臨海王鎮  
荊州掌知內命尋遷前軍刑獄叅軍事宋明帝

初江外拒命及義嘉敗荆土震擾江陵人宋景  
因亂掠城爲景所殺時年五十餘身旣遇難篇  
章無遺流遷人間者往往見在儲皇博採羣言  
遊好文藝片辭隻韻罔不收集照所賦述雖乏  
精典而有超麗爰命陪趨備加研訪年代稍遠  
零落者多今所存者儻能半焉



鮑參軍集卷之一

宋東海鮑照明遠著

明閩漳張爕紹和纂

賦

遊思賦

雲徑兮海衝上潮兮送風秋水兮駕浦涼煙兮  
日虹暮氣起兮遠岸黑陽精滅兮天際紅波泮  
泮兮無底山森森兮萬重平隰兮亘岸通川兮  
瀉壑仰盡兮天經俯窮兮地絡望波際兮曇曇

眺雲間兮灼灼乃江南之斷山信海上之飛鶴  
指煙霞而問鄉窺林嶼而訪泊撫身事而識苦  
念親愛而知樂苦與樂其何言悼人生之長役  
捨堂宇之密親坐江潭而爲客對蒹葭之遂黃  
視零露之方白鴻晨驚以響湍泉夜下而鳴石  
結中洲之雲蘿託綿思於遙夕瞻荆吳之遠山  
望邯鄲之長陌塞風馳兮邊草飛胡沙起兮鴈  
揚翩雖燕越之異心在禽鳥而同戚悵收情而  
攷淚遣繁悲而自抑此日中其幾時彼月滿而

將蝕生無患於不老奚引憂以自逼物因節以  
卷舒道與運而升息賤賣卜以當墟隱我耕而  
子織誠愛秦王之奇勇不願絕筋而稱力已矣  
哉使豫章生而可知夫何異乎叢棘

觀漏賦 有序

客有觀於漏者退而歎曰夫及遠者箭也而定  
遠非箭之功爲生者我也而制生非我之情故  
自箭而爲心不可憑者絃因生以觀我不可恃  
者年憑其不可恃故以悲哉况乎沉華密遠輕  
波潛耗而感神嬰慮者又自外而傷壽以是思  
生生亦勤矣乃爲賦云

佩流歎於馳年纓華思於奔月結蘭若以望楚  
弄參差以歌越撫凝肌於遷滯鑑雕容於髣髴

景有墜而易昏憂無方而難收歷攻階而升隄  
訪金壺之盈闕觀騰波之吞寫視驚箭之登沒  
箭旣沒而復登波長瀉而弗歸注沉穴而海漏  
射懸塗而電飛墮戶牖而知天掩雲霧而測暉  
剗百齡於纖隱積千里於空微彼崢嶸而行湓  
此冉冉而逾衰撫寸心而未改指分光而永違  
昔傷矢之奔禽聞虛弦之顛仆徒嬰刃而知懼  
豈潛機之能覺惟生經之霍靡亦悲長而懼促  
恒證古而秉心抱空意其如玉波沉沉而東注

日滔滔而西屬落繁馨於纖草殞豐華於喬木  
對易離而後歌據窮蹊而方哭雖接薪之更傳  
寧絕明之還續貫古今而并念信寡易而多難  
時不留乎激矢生乃急於走丸旣河源之莫壅  
又吹波而助瀾神怵迫而多慮心韞轡而歎歡  
望天涯而佇念擢雄劒而長歎嗟生民之永迷  
躬與後而皆恤死零落而無二生差池之非一  
理幽分於化前筭冥定於天秩與艾骨而招病  
猶剗腸而興疾情殊用而俱盡事離方而同失

聊弭志以高歌順煙雨而沉逸於是隨秋鴻而  
汎渚逐春鷺而登梁進賦詩而展念退陳酒以  
排傷物不可以兩大時無得而雙昌薰晚華而  
後落槿早秀而前亡姑屏憂以愉思樂茲情於  
寸光從江河之紆直委天地之圓方漏盈兮漏  
虛長無絕兮芬芳

傷逝賦

晨登南山望美中阿露團秋槿風卷寒蘿悽愴  
傷心悲如之何盡若窮煙離若剪絃如影滅地  
衡星殞天棄羣宇於明世閉金扃於下泉永山  
河以自畢眇千齡而弗旋思一言於向時邈衆  
代於古年逝稍遠而變體浸幽明而改時覽篇  
迹之如旦婉遺意而在茲忽若謂其不然自惆  
悵而驚疑循堂廡而下降歷幃戶而升基服委  
襟而褫帶噐蒙管而韜絲志存業而遺績身先



物而長辭豈重歡而可覲追前感之無期寒往  
暑來而不窮哀極樂反而有終燧已遷而禮革  
月旣逾而慶通心微微而就遠跡離離而絕容  
白日藹而回陰閨寂而深重冀憑靈於前物  
佇美目乎房櫳徒望思於永久邈歸來其何從  
結單心於暮條掩行淚於晨風念沉悼而誰劇  
獨嬰衰於逝躬草忌霜而逼秋人惡老而逼衰  
誠衰耄之可忌或甘願而志違彼一息之短景  
乃累恨之長暉尋平生之好醜成黃塵之是非

將滅耶而尙在何有去而無歸惟桃李之零落  
生有促而非天觀龜鶴之千祀年能富而情少  
反靈質於二塗亂感悅於雙抱日月飄而不留  
命倏忽而誰保譬明隙之在梁如風露之停草  
髮迎憂而送羣貌先悴而收藻共甘苦其幾人  
曾無得而偕老拂埃琴而抽思啓陳書而遐討  
自古來而有之夫何怨乎天道

燕城賦

彌迤平原南馳蒼梧漲海北走紫塞鴈門施以  
漕渠軸以崑岡重江複關之奧四會五達之莊  
當昔全盛之時車挂轉人駕肩屢閉撲地歌吹  
沸天孳貨鹽田鏟利銅山才力雄富士馬精妍  
故能侈秦法伏周令剏崇墉剏濬洫圖修世以  
休命是以板築雉堞之殷井幹烽櫓之勤格高  
五嶽袤廣三墳崕若斷岸矗似長雲製磁石以  
禦衝糊頽壤以飛文觀基扃之固護將萬祀而

一君出入三代五百餘載竟瓜剖而豆分澤菜  
依井荒葛冑途壇羅虺蜮階闕腐鼯木魅山鬼  
野鼠城狐風嗥雨嘯昏見晨趨饑鷹厲吻寒鴟  
嚇雛伏魑藏虎乳血餐膚崩榛塞路崢嶸古堠  
白楊早落寒草前衰稜稜霜氣蔌蔌風威孤蓬  
自振驚沙坐飛灌莽杳而無際叢薄紛其相依  
通池旣已夷峻隅又已頽直視千里外唯見起  
黃埃凝思寂聽心傷已摧若夫藻扃黼帳歌堂  
舞閣之基璇淵碧樹弋林釣渚之館吳蔡齊秦

之聲魚龍爵馬之玩皆蕪歎燼滅光沈響絕  
都妙姬南國麗人蕙心紉質玉貌絳脣莫不埋  
魂幽石委骨窮塵豈憶同輦之愉樂離宮之苦  
辛哉天道如何吞恨者多抽琴命操爲蕪城之  
歌歌曰邊風起兮城上寒井徑滅兮丘隴殘千  
齡兮萬代共盡兮何言

芙蓉賦

感衣裳於楚賦詠憂思於陳詩訪群英之艷絕  
標高名於澤芝會春陂乎夕張舉芙蓉而水嬉  
抽我衿之桂蘭點子吻之瑜辭選群芳之徽號  
單蘆陽之妙手測虎池之光潔爍彤輝之明媚  
粲雕霞之繁悅顧椒丘而非偶豈園桃而能埒  
彪炳以蒨藻翠景而紅波青房兮規接紫的兮  
圓羅樹妖嬈之弱幹散菡萏之輕荷上星光而

倒景下龍鱗而隱波戲錦鱗而夕映曜繡羽以  
晨過結游童之湘吹起榜妾之江歌備日月之  
溫麗非盛明而謂何若乃當融風之暄盪承暑  
雨之平渥被瑤塘之周流繞金渠之屈曲排積  
霧而揚芬鏡洞泉而含綠葉折水以爲珠條集  
露而成玉潤蓬山之瓊膏輝葱河之銀燭冠五  
華於仙草超四照於靈木雜衆姿於開卷閱群  
貌於昏明無長袖之容止信不笑之空城森紫  
葉以上擢紛湘蘂而不傾根雖割而琯徹柯旣

解而絲縈感盛衰之可懷實始終而常清故其  
爲芳也綢繆其爲媚也奔發對收則色殊比蘭  
則香越汎明彩於宵波飛澄華於曉月陋荆姬  
之朱顏嘆夏女之光髮恨狎世而貽賤徒愛存  
而賞沒雖凌群以擅奇終從歲而零歇



園葵賦

風煖凌開土昌泉動游塵隰日鳴雉依隴主人  
拂黃冠杖藜杖布蔬種平圻壤通畔修直膏畝  
夷敞白莖紫蒂豚耳鳴掌溝東陌西行三畦兩  
旣區旣鉏乃露乃映勾萌欲伸藂牙將放爾乃  
晨露夕陰霏雲四委沉雷遠震飛雨輕灑徐未  
及晞疾而不靡柔苒爰秀剛甲以解稚葉萍布  
弱陰競抽萋萋翼翼沃沃油油下葳蕤而被逕  
上參差而覆疇承朝陽之麗景得傾柯之所投

仕非魯相有不拔之利賓非二仲無逸馬之憂  
顧董茶而莫偶豈蘋藻之薦羞若乃鄰老談稼  
女嫗歸桑拂此葦席炊彼稌梁甃壺援醢曲瓢  
卷漿乃羹乃瀹堆鼎盈筐甘旨蒨脆柔滑芬芳  
消淋逐水潤胃調腸於是既飫徹盤投筯回小  
人之腹爲君子之慮近觀物運遠訪師聖聲數  
後彰律理前定烏非黔黑鶴豈浴淨彼圓行而  
方止固得之於天性伊冬筴而夏裘無雙功而  
並盛盍然任心樂道安命春風夕來秋日晨映

獨酌南軒擁琴孤聽篇章間作以歌以詠魚深  
沉而鳥高飛孰知美色之爲正

舞鶴賦

散幽經以驗物偉胎化之仙禽鍾浮曠之藻質  
抱清迥之明心指蓬壺而翻翰望峴闕而揚音  
匪日域以迴鶩窮天步而高尋踐神區其旣遠  
積靈祀而方多精舍丹而星耀頂凝紫而煙華  
引圓吭之纖婉頓修趾之洪矜疊霜毛而弄影  
振玉羽而臨霞朝戲於芝田夕飲乎瑤池厭江  
海而游澤掩雲羅而見羈去帝鄉之岑寂歸人  
寰之喧卑歲崢嶸而催暮心惆悵而哀離於是

窮陰殺節急景周年涼沙振野箕風動天嚴嚴  
苦霧皎皎悲泉冰塞長河雪滿群山旣而霧昏  
夜歇景物澄廓星翻漢迴曉月將落感寒雞之  
早晨憐霜鴈之違漠臨驚風之蕭條對流光之  
照灼唳清響於丹墀舞飛容於金閣始連軒以  
鳳蹕終宛轉而龍躍躑躅徘徊振迅騰摧驚身  
蓬集矯翅雪飛離網別赴合緒相依將興中止  
若往而歸颯沓矜顧遷延遲暮逸翮後塵翺翥  
先路指會規翔臨岐矩步態有遺妍貌無停趣

奔機逗節角睐分形長揚

一作楊翹

緩鷺並翼連聲

輕迹凌亂浮影交橫衆變繁姿參差滄密煙交  
霧凝若無毛質風去雨還不可談悉旣散魂而  
盪目迷不知其所之忽星離而雲罷整神容而  
自持仰天居之崇絕更調暢以驚思當是時也  
燕姬色沮巴童心恥巾拂兩停九劒雙止雖邯  
鄲其敢倫豈陽阿之能擬入衛國而乘軒出吳  
都而傾市守馴養於千齡結長悲於萬里

野鵝賦 并序

有獻野鵝於臨川王世子愍其樊繫命爲之賦  
其辭曰

集陳之隼以自遠而稱神栖漢之雀乃出幽而  
見珍此璫禽其何取亦厠景而承仁捨水澤之  
驩逸對鐘鼓之悲辛豈徇利而輕命將感愛而  
投身入長羅之逼脅悵高繳之樊縈邈辭朋而  
別偶超煙霧而風行跨日月以遙逝忽瞻國而  
望城踐非迹於瑤塗昇弱羽於丹庭瞰東西之

繡戶眺左右之金嶺貌織殺而含悴心翻越而  
慙驚若墜淵而墮谷恍不知其所寧惟君囿之  
珍麗實妙物之所殷翔海澤之輕鷗巢天宿之  
鳴鶉鷦程材於梟猛輦薦體之雕文旣敷容以  
照景亦避翮而排雲雖居物以成偶終在我以  
非群望征雲而延悼顧委翼而自傷無青雀之  
銜命乏赤鴈之嘉祥空穢君之園池徒慙君之  
稻梁願引身而剪迹抱末志而幽藏於是流歲  
遂遠慘節方崇雲纏海岱風拂嶠瀕飛翳馳霞



飄沙舞蓬視清池之初涸望綠林之始空立菰  
蒲之寒渚託隻影而爲雙宛拔啄而掩背悲結  
悵而滿曾處朝晝而雅念假外見而遷排涉修  
夜之長寂信專思而知哀風稍稍而過樹月蒼  
蒼而照臺冰依岸而早結霜託草而先摧斂雙  
翻於水裔翹孤趾於林隈情無方而雨集事有  
限而星乖在俄頃而猶悼矧窮生之所懷聞宿  
世之高賢澤無微而不均育草木而明義愛禽  
鳥而昭仁全殞卵而來鳳放乳麕而感麟雖陋

生於萬物若沙漠之一塵苟全軀而畢命庶魂  
報以自申

尺蠖賦

智哉尺蠖觀機而作伸非何厚屈非何薄當靜  
泉亭遇躁風驚起軒軀以曠跨伏累氣而併形  
冰炭弗觸鋒刃靡迕逢嶮蹙跨值夷舒步忌好  
退之見徭哀必進而爲蠹每驤首以瞰途常佇  
景而翻露故身不豫託地無前期動靜必觀於  
物消息各隨乎時從方而應何慮何思是以軍  
筭慕其權國容擬其變高賢圖之以隱淪智士  
以之而藏見笑靈蛇之久蟄羞龍德之方戰理

害道而爲尤事傷生而感賤苟見義而守勇豈  
專取於弦箭

飛蛾賦

仙鼠伺闇飛蛾候明均靈舛化詭欲齊生觀齊  
生而欲詭各會住以憑方凌焦煙之浮景赴熙  
燄之明光拔身幽草下畢命在此堂本輕死以  
邀得雖糜爛其何傷豈學山南之文豹避雲霧  
而巖藏

鮑參軍集卷之二

宋東海鮑照明遠著

明閩漳張燮紹和纂

樂府

採桑

以下  
五言

季春梅始落工女事蠶作採桑淇水間還戲上  
宮閣早蒲時結陰晚篁初解籜藹藹霧滿閨融  
融景盈幕乳燕逐草蟲巢蜂拾花萼是節最暄  
妍佳服又新爍綿玉臺作歛歎對迴塗揚歌弄場藿

魚...  
抽琴試杼思薦珮果成託承君郢中矣服義久  
心諾衛風古愉艷鄭俗舊浮薄靈願悲渡湘宓  
賦笑灋洛盛明難重來淵意爲誰涸君其且調  
絃桂酒妾行酌

### 代蒿里行

同盡無貴賤殊願有窮仲馳波催永夜零露逼  
短晨結一作驅我幽山駕去此清堂親虛容遺劍  
佩實貌戢衣巾斗酒安可酌尺書誰復陳年代  
稍推遠懷抱日幽淪人生良自劇天道與何人

齋我長恨意歸爲狐鬼塵

代挽歌

獨處重冥下憶昔登高臺傲岸平生中不爲物  
所裁埏門只復閉白蟻相將來生時芳蘭體小  
蟲今爲災玄鬚無復根枯體依青苔憶昔好飲  
酒素盤進青梅彭韓及康蔣疇昔已成灰壯士  
皆死盡餘人安在哉

代東門行

傷禽惡弦驚倦客惡離聲離聲斷客情賓御皆



涕零涕零心斷絕將去復還訣一息不相知何  
況異鄉別遙遙征駕遠杳杳白日晚居人掩閨  
卧行子夜中飯野風吹草木行子心腸斷食梅  
常苦酸衣葛常苦寒絲竹徒蒲座憂人不解顏  
長歌欲自慰彌起長恨端

代放歌行

蓼蟲避葵藿習苦不言非小人自齷齪安知曠  
士懷雞鳴洛城裏禁門平旦開冠蓋縱橫至車  
騎四方來素帶曳長飈華纓結遠埃日中安能

止鐘鳴絳未歸夷世不可逢賢君信愛才明慮  
自天斷不受外嫌猜一言分珪爵片善辭草萊  
豈伊白壁賜將起黃金臺今君有何疾臨路獨  
遲迴

代陳思王京洛篇

玉臺作煌  
煌京洛

鳳樓十二重四戶八綺窓繡桷金蓮花桂柱玉  
盤龍珠簾無隔露羅幌不勝風寶帳三千所爲  
爾一朝容揚芬紫煙上垂綵綠雲中春吹回白  
日霜高落塞鴻但懼秋塵起盛愛逐衰蓬坐視

青苔滿卧對錦筵空琴瑟縱橫散舞衣不復縫  
古來其坎薄君意豈獨濃唯見雙黃鵠千里一  
相從

代門有車馬客行

門有車馬客問客何鄉士捷步往相訊果得舊  
鄰里悽悽聲中情慊慊增下俚語昔有故悲論  
今無新喜清晨相訪慰日暮不能已歡戚競尋  
緒談調何終止辭端竟未究忽唱分途始前悲  
尙未弭後感方復起嘶聲盈我口談言在君耳

手迹可傳心願爾篤行李

代權歌行

羈客離嬰時飄颻無定所昔秋寓江介茲春客  
河許往戢于役身願言永懷楚冷冷儵䟽潭邕  
邕鴈循渚鰲戾長風振搖曳高帆舉驚波無留  
連舟人不躊躇

代白頭吟

直如朱絲繩清如玉壺冰何慙宿昔意猜恨坐  
相仍人情賤恩舊世議逐衰興毫髮一爲瑕丘

山不可勝食苗實碩鼠點白信蒼蠅鳬鵠達成  
美薪芻前見陵中黜褒女進班去趙姬升周王  
日淪惑漢帝益嗟稱心賞猶難特貌恭豈易憑  
古來共如此非君獨撫膺

代東武吟

主人且勿誼賤子歌一言僕本塞鄉士出身蒙  
漢恩始隨張校尉占一作募到河源後逐李輕

車追虜窮塞垣密塗亘萬里寧歲猶七奔肌力  
盡鞍甲心思歷涼溫將軍旣下世部曲亦罕存

時事一朝異，孤續誰復論。少壯辭家去，窮老還入門。腰鎌刈葵藿，倚杖牧鷄豚。昔如韝上鷹，今似檻中猿。徒結千載恨，空負百年怨。棄席思君幄，疲馬戀君軒。願垂晉主惠，不愧田子魂。

代別鶴操

雙鶴俱起時，徘徊滄海間。長弄若天漢，輕軀似雲懸。幽客時結侶，提携遊三山。青繳凌瑤臺，丹羅籠紫煙。海上悲風急，三山多雲霧。散亂一相失，驚孤不得住。緬然日月馳，遠矣絕音儀。有願

而不遂無怨以生離鹿鳴在深草蟬鳴隱高枝  
心自有所存

一作懷

旁人那得知

代出自薊北門行

羽檄起邊亭烽火入咸陽徵騎屯廣武分兵救  
朔方嚴秋筋竿勁虜陣精且彊天子按劍怒使  
者遙相望雁行緣石徑魚貫度飛梁簫鼓流漢  
颺旌甲被胡霜疾風衝塞起沙礫自飄揚馬毛  
縮如蝟角弓不可張時危見臣節世亂識忠良  
殺軀報明主身死爲國殤

代陸平原君子有所思行

西上登雀臺東下望雲闕層閣蕭天居馳道直  
如髮繡甍結飛霞璇題納行月築山擬蓬壺穿  
池類溟渤選色遍齊岱微聲匝邛越陳鐘陪夕  
讌笙歌待明發年貌不可還身意會盈歇蟻壤  
漏山阿舍作河絲淚毀金骨噐惡含蒲歆物忌厚  
生沒智哉衆多士服理辨昭晰

代悲哉行

舊集載此樂府作謝惠連

羈人感淑節緣感欲回轍我行詎幾時華實驟



舒結覩實情有悲瞻華意無悅覽物懷同志如  
何復乖別翩翩翔禽羅關關鳴鳥列翔鳴尙儔  
偶所歎獨乖絕

代陳思王白馬篇

白馬騁角弓鳴鞭乘北風要途問邊急雜虜入  
雲中閉壁自往夏清野徑還冬僑裝多闕絕旅  
服少裁縫埋身守漢境一作節沈命對胡封薄暮  
塞雲起飛沙被遠松含悲望兩都楚歌登四墉  
丈夫設計誤懷恨逐邊戎棄一作羅別中國愛邀

真胡馬功去來今何道卑賤生所鍾但合塞上  
兒知我獨爲雄

代昇天行

家世宅關輔勝帶宦王城備聞十帝事委曲兩  
都情倦見物興衰驟覩俗屯平翩翩若回掌恍  
惚似朝榮窮途悔短計晚志重一作愛長生從師  
入遠嶽結友事仙靈五圖一作芝發金記九籀隱

月經風餐委松宿雲卧恣天行冠霞登綵閣解  
玉飲椒庭暫遊越萬里少一作近別數千齡鳳臺

無還駕簫管有遺聲何當與汝曹啄腐共吞腥

松柏篇

并序

余患脚上氣四十餘日知舊先借傳玄集以  
余病劇遂見還開袞適見樂府詩龜鶴篇於  
危病中見長逝詞惻然酸懷抱如此重病彌  
時不差呼吸乏喘舉目悲矣火藥間闕而擬  
之

松柏受命獨歷代長不衰人生浮且脆眴若晨

風悲東海遙逝川西山導落暉南廓

一作如

悅籍

短蒿里收來歸諒無疇昔時百病起盡期志士  
惜牛刀恐勉自療治傾家行藥事顛沛去迎醫  
徒備火石苦奄至不得辭龜齡安可獲岱宗限  
已迫膚聖不得留爲善何所益捨此赤縣居就  
彼黃墟宅永離九原親長與三辰隔屬續生望  
盡園棺世業埋事痛存人心恨結亡者懷祖葬  
旣云乃壙隧亦已開室族內外哭親疎同共哀  
外姻遠近至名列通夜臺扶輿出殯宮低回戀  
庭室天地有盡期我去無還日居者今已盡人

事從此畢火歇煙旣沒形銷聲亦滅鬼神來依  
我生人永辭訣大暮杳悠悠長夜無時節鬱湮  
重冥下煩冤難具說安寢委沈冥戀戀念平生  
事業有餘結刊述未及成資儲無擔石兒女皆  
孩嬰一朝放捨去萬恨纏我情追憶世上事束  
教已自拘明發靡怡愈夕歸多憂虞轍閒晨逕  
荒撤宴式酒濡知今暝日苦恨失爾時娛遙遙  
遠民居獨埋深壤中墓前人跡滅冢上草日豐  
空林響鳴蜩高松結悲風長寐無覺期誰知

者窮生存處交廣連榻斜華茵已沒一何苦  
哉不容身昔日平居時晨夕對六親今日掩  
柩一見無諧因禮席有降殺三齡速過隙几筵  
就收撤室宇改疇昔行女遊歸途仕子復主役  
家世本平常獨有亡者劇時祀望歸來四節靜  
瑩丘孝子撫墳號父今知來不欲還心依戀欲  
見絕無由煩冤荒隴側肝心盡崩抽

代苦熱行

赤阪橫西阻火山赫南威身熱頭且痛鳥墜魂

來歸湯泉發雲潭焦煙起石圻日月有恒昏雨  
露未嘗晞丹蛇踰百尺玄蜂盈十閭含沙射流  
影吹蠱病行暉瘴氣晝薰體茵露夜濡衣饑猿  
莫下食晨禽不敢飛毒涇尙多死度瀘寧具腓  
生軀陷死地昌志登禍機戈船榮旣薄伏波賞  
亦微爵輕君尙惜士重安可希

代朗月行

朗月出東山照我綺窓前窓中多佳人被服妖  
且妍靚粧坐帷裏當戶弄清絃鬢奪衛女迅體

絕飛燕先爲君歌一曲當作朗月篇酒至顏自  
解聲和心亦宣千金何足重所存意氣間

代堂上歌行

四坐且莫諠聽我堂上歌昔仕京洛時高門臨  
長河出入重宮裏結友暫與何車馬相馳逐賓  
朋好容華陽春孟春月朝光散流霞輕步逐芳  
風言笑弄丹葩暉暉朱顏酡紛紛織女梭滿堂  
皆美人目成對湘娥雖謝侍君閑明粧帶綺羅  
箏笛更彈吹高唱好相和萬曲不關心一曲動



情多欲知情厚薄更聽此聲過

代結客少年塲行

驄馬金絡頭錦帶佩吳鉤失意杯酒間白刃起  
相讐追兵一旦至負劒遠行遊去鄉三十載復  
得還舊丘升高臨四關表裏望皇州九衢平若  
水雙闕似雲浮扶宮羅將相夾道列王侯日中  
市朝滿車馬若川流擊鐘陳鼎食方駕自相求  
今我獨何爲增稟懷百憂

扶風歌

昨辭金華殿今次鴈門縣寢卧握秦戈樓息抱  
越箭悲別親知行泣隨征傳寒煙空徘徊朝  
日乍舒卷

代少年時至衰老行

憶昔少年時馳逐好名晨結友多貴門出入富  
兒鄰綺羅艷華風車馬自揚塵歌唱青齊女彈  
箏燕趙人好酒多芳氣備味厭時新今日每相  
念此事邈無因寄語後生子作樂當及春

代陽春登荆山行

旦登荆山頭崎嶇道難遊早行犯霜露苔滑不  
可留極眺入雲表窮目盡帝州方都列萬室層  
城帶高樓奕奕朱軒馳紛紛綺衣流日氛映山  
浦暄霧逐風收花木亂平原桑柘綿平疇攀條  
弄紫莖藉露折芳柔遇物雖成趣念者不解憂  
且共傾春酒長歌登山丘

代貧賤苦愁行

湮沒雖死悲貧苦卽生劇長歎至天曉愁苦窮  
日夕盛顏當少歇鬢髮先老白親友四面絕朋

知斷三益空庭慙樹萱藥餌覺過客貧年忘日  
時黧顏就人惜俄頃不相酬惡泥面已赤或以  
一金恨便成百年隙心爲千條計事未見一獲  
運圯津塗塞遂轉死溝洫以此窮百年不如還  
窳窳

### 代邊居行

少年遠京陽遙遙萬里行陋巷絕人徑茅屋推  
山嵐不覩車馬迹但見麋鹿場長松何落落在  
隴無復行邊地無高木蕭蕭多白楊盛年日月

盡一去萬恨長悠悠世中人爭此錐刀忙不憶  
貧賤時富貴輒相忘紛紛徒滿目何關慨予傷  
不如一畝中高會挹清漿遇樂便作樂莫使候  
朝光

代邽街行

一作去邽行

竚立出門衢遙望轉蓬飛蓬去舊根在連翩逝  
不歸念我拾鄉俗親好久乖違慷慨懷長想惆  
悵戀音徽人生隨事變遷化焉可祈百年難必  
果千慮易盈虧

蕭史曲

梁庠作通照藝文作張華然此詩  
寫格不類晉人當以樂府爲正

蕭史愛長年  
羸女委童顏  
火粒願排棄  
霞霧好登攀  
龍飛逸天路  
鳳起出秦關  
身去長不返  
簫聲時往還

王昭君

旣事轉蓬遠  
心隨鴈路絕  
霜鞞旦夕驚  
邊笳中夜咽

吳歌三首

夏口樊城岸  
曹公却月戍  
但觀流水還  
識是儂

流下

夏口樊城并曹公却月樓觀見流水還識是儂  
淚流

人言荆江狹荆江定自濶五兩子無聞風聲那  
得達

採菱歌七首

驚舠馳桂浦息棹偃榔潭簫弄澄湘北菱歌清  
漢南

舳舻寒蕙萸停唱紉薰若含傷拾泉花營念採

雲夢

聯潤逢暄新悵怨值妍華秋心不可盪春思亂  
如麻

要艷雙嶼裏望笑兩洲間裏裏風出浦容容

樂府

作沈

日向山

煙墮越嶂深箭迅楚江急空抱琴中悲徒望近

關涘

緘歎凌珠淵收慨上金堤春芳行歇落是人方  
未齊



思今懷近憶望古懷遠識懷古復懷今長懷無  
終極

幽蘭五首

傾輝引暮色孤景留思顏梅歇春欲罷期渡往  
不還

簾委蘭蕙露帳合桃李風憚帶昔何道坐今芳  
節終

結佩徒分明抱梁輒乖忤華落知不終空愁坐  
相誤

耿耿蛸挂網漠漠蠶弄絲空慙不自信怯與君  
畫期

陳國鄭東門古今共所知長袖暫徘徊駟馬停  
路岐

中興歌十首

千冬遲一春萬夜視朝日生平值中興歡起百  
憂畢

中興太平運化清四海樂祥景照玉臺紫煙遊  
鳳閣

碧樓含夜月紫殿爭朝光  
綵池散蘭麝風起自生芳

白日照前窓玲瓏綺羅中  
笑人掩輕扇含思歌春風

三五容色滿四五妙華歇  
已輪春日歡分隨秋光沒

北出湖邊戲前還苑中遊  
飛轂繞長松馳管逐波流

九月秋水清三月春花滋  
千金逐良日皆競中

興時

窮泰已有分壽夭復屬天  
既見中興樂莫持憂  
自煎

襄陽是小地壽陽非帝城  
今日中興樂遙冶在  
上京

梅花一時艷竹葉千年色  
願君松柏心採照無  
窮極

代白紵舞歌詞四首

以下  
七言

吳刀楚製爲佩褱織羅霧縠垂羽衣含商咀徵

歌露晞珠履颯沓紈袖飛淒風戛起素雲回車  
怠馬煩客忘歸蘭膏明燭承夜輝

桂宮柏寢擬天居朱爵文窓鞞綺疏象牀瑤席

鎮犀渠雕屏匝匝組帷

一作帳

舒秦箏趙瑟挾笙

等垂璫散珮盈玉除停觴不御欲誰須

三星參差露霑濕絃悲管清月將入塞光蕭條  
候蟲急荆王流歎楚妃泣紅顏難長時易戰凝  
華結藻久延立非君之故豈安集

池中赤鯉庖所捐琴高乘去騰上天命逢福世

丁溢恩

一作微命逢  
福丁溢恩

簪金龍綺升曲筵

德委如山潔誠洗志期暮年烏白馬角寧足言

代白紵曲二首

朱唇動素腕舉洛陽少年邯鄲女古稱淥水今  
白紵催絃急管爲君舞窮秋九月荷葉黃北風  
驅鴈天雨霜夜長酒多樂未央

春風澹蕩俠思多天色淥氣妍和含桃紅萼  
蘭紫芽朝日灼爍發園華卷幌結帷羅玉筵齊  
謳秦吹盧女絃千金顧笑買芳年

代鳴鴈行

嗚鴈鳴始旦齊行命旅入雲漢  
中夜相失羣離亂留連徘徊不忍散  
憔悴容儀君不知辛苦風霜亦何爲

擬行路難十八首

以下雜言

奉君金卮之美酒璚瑁玉匣之雕琴  
七綵芙蓉之羽帳九華蒲萄之錦衾  
紅顏零落歲將暮寒光宛轉時欲沈  
願君裁悲且減思聽我抵節行路吟  
不見柏梁銅雀上寧聞古時清吹音

洛陽名工鑄爲金轉山千斷復萬鏤上刻秦女  
攜手仙承君清夜之歡娛列置幃裏明燭前外  
發龍鱗之丹綵內含麝芬之紫煙如今君心一  
朝異對此長歎終百年

璇閨玉墀上椒閣文窓繡戶垂羅幕中有一人  
字金蘭被服纖羅采芳藿春燕參差風散梅開  
幃對景弄春爵含歌攬涕恒抱愁

玉臺作  
不能言

人生

幾時得爲樂寧作野中之雙鳬不願雲間之別

鶴



瀉水置平地各自東西南北流人生亦有命安  
能行歎復坐愁酌酒以自寬舉杯斷絕歌路難  
心非木石豈無感吞聲躑躅不敢言

君不見河邊草冬時枯死春蒲道君不見城上

日今暝沒盡

一作山

夫明朝復更出今我何時當

得然一去未減入黃泉人生苦多歡樂少意氣  
敷腴在盛年且願得志數相就牀頭恒有沽酒  
錢功名竹帛非我事存亡貴賤付皇天

對案不能食拔劍擊柱長歎息丈夫生世會幾

時安能蹠蹠垂羽翼棄置罷官去還家自休息  
朝出與親辭暮還在親側弄兒牀前戲看婦機  
中織自古聖賢盡貧賤何況我輩孤且直

愁思忽而至跨馬出北門舉頭四顧望但見松  
柏園荆棘鬱躑躑中有一鳥名杜鵑言是古時  
蜀帝魂聲音哀苦鳴不息羽毛憔悴似人髡飛  
走樹間啄蟲蟻豈憶往日天子尊念此死生變  
化非常理中心惻愴不能言

中庭五株桃一株先作花陽春妖冶二三月從

風簸蕩落西家西家思婦見悲惋零淚霑衣撫  
心歎初送我君出戶時何言淹留節廻換牀席  
生塵明鏡垢纖腰瘦削髮蓬亂人生不得恒稱  
意惆悵徙倚至夜半

剗藥染黃絲黃絲歷亂不可治我昔與君始相  
值爾時自謂可君意結帶與君言死生好惡不  
相置今日見我顏色衰意中索寞與先異還君  
金釵玳瑁簪不忍見之

一作此

益愁思

君不見薜華不終朝須臾奄冉零落銷盛年妖

艷浮華華不久亦當諸塚頭一去無還期千秋  
萬歲無音詞孤魂杳杳空隴間獨魄徘徊遶墳  
基但聞風聲野鳥吟豈憶平生盛年時爲此令  
人多悲悵君當縱意自熙怡

君不見枯籜走階庭何時復青著故莖君不見  
亡靈蒙享祀何時傾杯竭壺罌君當見此起彼憂  
思寧及得與時人爭人生倏忽如絕電華年盛  
德幾時見但令縱意存高尚肯酒嘉肴相胥讌  
持此從朝竟夕暮差得亡憂消愁怖胡爲惆悵

不能已難盡此曲令君忤

今年陽初花滿林明年冬末雪盈岑推移代謝  
紛交轉我君邊戍獨稽沈執袂分別已三載邇  
來寂淹無分音朝悲慘慘遂成滴暮思遶遶最  
傷心膏沐芳餘久不御蓬首亂鬢不設簪徒飛  
輕埃舞空帷紛筐黛黑靡復遺自生留世苦不  
幸心中惕惕恒懷悲

春禽啾啾旦暮鳴最傷君子憂思情我初辭家  
從軍僑榮志溢氣干雲霄流浪漸冉經三齡忽

有白髮素髭生今暮臨水拔已盡明日對鏡復  
已盈但恐羈死爲鬼客客思寄滅生空精每懷  
舊鄉野念我舊人多悲聲忽見過客問何我寧  
知我家在南城答云我曾居君鄉知君遊宦在  
此城我行離邑已萬里今方羈役去遠征來時  
聞君婦閨中孀居獨宿有貞名亦云悲朝泣閒  
房又聞暮思淚霑裳形容憔悴非昔悅蓬鬢衰  
顏不復粧見此令人有餘悲當願君懷不暫忘  
君不見少壯從軍去白首流離不得還故鄉官

宵日夜隔音塵斷絕阻河關朔風蕭條白雲飛  
胡笳哀極邊氣寒聽此愁人今柰何登出遠望  
得留顏將死胡馬跡能見妻子難男兒生世慙  
軻欲何道綿憂摧抑起長歎

君不見柏梁臺今日丘墟生草萊君不見阿房  
宮寒雲澤雉棲其中歌妓舞女今誰在高墳纍  
纍滿山隅長袖紛紛徒競世非我昔時千金軀  
隨酒逐樂任意去莫令含歎下黃墟

君不見冰上霜表裏陰且寒雖蒙朝日照信得

幾時安民生故如此誰令摧折強相看  
年去年來自如削白髮零落不勝冠

君不見春鳥初至時百草含青俱作花  
塞風蕭索一旦至竟得幾時保光華  
日月流邁不相饒令我愁思怨恨多

諸君莫歎貧富貴不由人丈夫四十彊而仕  
余當二十弱冠辰莫言草木委冬雪  
會應蘇息遇陽春對酒叙長篇窮途運命委皇天  
但願樽中九醞滿莫惜牀頭百個錢  
直須優游卒一歲何



勞辛苦事百年

梅花落

中庭雜樹多偏爲梅客嗟問君何獨然念其霜  
中能作花露中能作實搖蕩春風媚春日念爾  
零落逐寒風徒有霜華無霜質

代淮南王

玉臺分朱城以  
下別作一首

淮南王好長生服食鍊氣讀仙經琉璃作益牙  
作盤金鼎玉七合神丹合神丹戲紫房紫房綵  
女弄明璫鸞歌鳳舞斷君腸朱城九門門九闔

願逐明月入君懷  
入君懷結君佩  
怨君恨君恃君愛  
築城思堅劍思利  
同盛同衰莫相棄

代雉朝飛

雉朝飛振羽翼  
專場挾雌恃彊力  
媒已驚翳又逼蒿  
間潛穀盧矢直勿  
繡頸碎錦臆絕命  
君前無怨色  
握君手執杯酒  
意氣相傾死何有

代北風涼行

北風涼雨雪雱  
京洛女兒多妍粧  
遙豔帷中自悲傷  
沈吟不語若有忘  
問君何行何當歸  
苦使

妾坐自傷悲慮年至慮顏衰情易復恨難追

代空城雀

雀乳四轂空城之阿朝食

一作拾

野粟夕飲冰河

高飛畏鷗鳶下飛畏網羅辛傷伊何言怵迫良  
已多誠不及青鳥遠食玉山禾猶勝吳宮燕無  
罪得焚窠賦命有厚薄長歎欲如何

代夜坐吟

冬夜沈沈夜坐吟含聲未發已知心霜入幕風  
度林朱燈滅朱顏尊體君歌逐君音不貴聲貴

意深

代春日行

三言

獻歲發吾將行春山茂春日明園中鳥多嘉聲  
梅始發柳始青汎舟鱸齊櫂驚奏採菱歌鹿鳴  
風微起波微生絃亦發酒亦傾入蓮池折桂枝  
芳袖動芬葉披兩相思兩不知